

### *Izvjestaj sa 13. sjednice Općinskog vijeća Ilijaš*

Po trinaesti put od konstituiranja, danas je zasjedalo Općinsko vijeće Ilijaš.

Na Dnevnom redu našlo se trinaest tačaka, od kojih su najviše pažnje vijećnika privukle Informacija o aktuelnom stanju u oblasti zdravstva na području Općine Ilijaš kao i Nacrt Budžeta Općine Ilijaš za 2014. godinu.

Nakon što je Dnevni red jednoglasno usvojen vijećnici su prešli na vijećnička pitanja i inicijative.

Na 12. sjednici Općinskog vijeća Ilijaš, donesen je zaključak u kojem Općinsko vijeće Ilijaš zahtjeva od Elektrodistribucije Sarajevo da u roku od deset dana od dana prijema zaključka dostavi Općinskom vijeću Ilijaš program mjera i program rješenja koji će garantovati uredno snabdijevanje Ilijaša električnom energijom. Obzirom da zaključak nije dostavljen, a da je u međuvremenu evidentiran duži nestanak električne energije zbog ponovne kradže kablova, Općinsko vijeće se usaglasilo da se uputi urgencija Elektrodistribuciji, da se očituju po ovom problemu u roku od 15 dana. Ukoliko ne dostave navedeni program mjera Općinsko vijeće će obavijesti nadležne inspekcijske organe o ovom problemu.

U okviru treće tačke Dnevnog reda vijećnicima je predočena Informacija o aktuelnom stanju u oblasti zdravstva na području Općine Ilijaš, o kojoj su govorili, direktorica JU Dom zdravlja Kantona Sarajevo, prim.dr. Dženana Tanović, direktor Organizacione jedinice Dom zdravlja Ilijaš, dr. Nijaz Šitkovac, predstavnik Zavoda zdravstvenog osiguranja Kantona Sarajevo, dr. Abdulkerim Fazlić i predstavnica JU Zavoda za hitnu medicinsku pomoć Kantona Sarajevo, dr. Amra Bašić.

Prim.dr. Dženana Tanović je istakla da je Zavod zdravstvenog osiguranja Kantona Sarajevo izdvojio novčana sredstva u iznosu od 150.000,00 KM za nabavku rendgen aparata za OJ Dom zdravlja Ilijaš, provedena je procedura javnih nabavki aparata, ali zbog izjavljene žalbe, jednog od učesnika tendera Uredu za žalbe, ne može se krenuti u dalju realizaciju.

Nadziđivanje objekta Doma zdravlja u Ilijašu direktorica u potpunosti podržava, time bi se stvorili adekvatni uslovi za otvaranje Centra za mentalno zdravlje kao i Centra za fizikalnu rehabilitaciju, te tako građani Općine Ilijaš ne bi morali koristiti ove usluge u Vogošći i Sarajevu.

Dr.Amra Bašić, navela je da JU Zavod za hitnu medicinsku pomoć Kantona Sarajevo, punkt Ilijaš rade svakim danom od 20,00 do 08,00 sati. U periodu od 01.01.2013. godine do 01.09.2013. godine imali su 4000 intervencija te da nemaju pritužbi pacijenata. Navela je i to da je Osnivač JU Zavoda za hitnu medicinsku pomoć, Kanton Sarajevo, te je za sve statusne promjene iz nadležnosti ove ustanove potrebno tražiti saglasnost Skupštine Kantona Sarajevo.

24 satno radno vrijeme bi podrazumijevalo angažman 2,5 tima i nabavku još jednog specijalnog vozila.

Nakon ovih izlaganja Općinsko vijeće je usvojilo sljedeće zaključke:

1. Predlažemo Kolegiju Skupštine Kantona Sarajevo da uvrsti tačku dnevnog reda o produženju radnog vremena Hitne pomoći u Organizacionoj jedinici Ilijaš na 24h radno vrijeme. Pripremu zaključka će uraditi Služba za društvene djelatnosti i proslijediti Predsjedavajućoj Skupštine Kantona Sarajevo, Zamjenicima, predsjednicima klubova parlamentalnih stranaka koje djeluju u Skupštini Kantona Sarajevo, Ministarstvu zdravstva Kantona Sarajevo, JU Hitna pomoć Kantona Sarajevo i Zavodu zdravstvenog osiguranja.
2. Zadužuju se slijedeće institucije da u svojim finansijskim planovima za 2014. godinu razmotre mogućnost uvrštavanja nadogradnje Doma zdravlja u Ilijašu, prije svega Općina Ilijaš, JU Dom zdravlja Kantona Sarajevo u saradnji sa organizacionom jedinicom Ilijaš, Ministarstvo zdravstva Kantona Sarajevo, Federalno ministarstvo zdravstva i Zavod zdravstvenog osiguranja. Ovaj zaključak dostaviti na adresu navednih u zaključku.
3. Da Direktor Doma zdravlja Ilijaš u saradnji sa JU Dom zdravlja Kantona Sarajevo razmotri mogućnost uvođenja druge smjene radnog vremena Doma zdravlja na lokalitetu Srednje do 20h. Zaključak proslijediti Direktoriju Doma zdravlja Ilijaš i JU Dom zdravlja Kantona Sarajevo.

4. Da JU Apoteke Sarajevo vode računa o planiranju i korištenju godišnjih odmora, te da se zbog istih ne zatvara objekat apoteke u Srednjem. Zaključak proslijediti JU Apoteke Sarajevo.
5. Ministarstvu zdravstva Kantona Sarajevo uputiti zaključak da se odobri zahtjev za otvaranje apoteke u MZ Mrakovo, uz Dom zdravlja.

U nastavku sjednice pomoćnica načelnika u Službi za privredu, finansije i investicije je izložila vijećnicima Informaciju o izvršenju Budžeta Općine Ilijaš za period od 01.01. do 30.09.2013. godine. Vijećnici su informaciju primili k znanju.

Nacrt Budžeta Općine Ilijaš za 2014. godinu, usvojen je većinom glasova i iznosi 8.819.800,00 KM. Nacrt Budžeta Općine Ilijaš sastoji se od prihoda i rashoda. Projekcija ukupno planiranih prihoda Nacrtom Budžeta za 2014. godinu iznosi 8.819.800,00 KM što je 13,1% manje u odnosu na plan prihoda za 2013. godinu. U ukupnoj strukturi ovih prihoda najznačajniji su prihodi po osnovu Poreza na imovinu, Poreza na nepokretnost te prihod po osnovu indirektnih poreza koji pripadaju općini, a odnose se na indirektno poreze koji se naplaćuju iz cijene nafte i naftnih derivata. Ukupno procijenjeni rashodi i izdaci u Nacrtu Budžeta za 2014. godinu iznose 8.819.800 KM, što je za 13,1 % manje u odnosu na plan Budžeta Općine Ilijaš za 2013. godinu ;

Nacrt budžeta bit će upućen u dvadesetdnevnu javnu raspravu, objavom putem web stranice Općine Ilijaš i objavom na oglasnoj ploči Općine Ilijaš. U javnoj raspravi učestvovat će građani, mjesne zajednice, budžetski korisnici, političke stranke i ostale asocijacije i udruženja građana.

Kako je navedeno, javna rasprava trajat će 20 dana, počev od 29.11.2013. godine do 18.12.2013. godine. Javna prezentacija Nacrta Budžeta Općine Ilijaš za 2014. godinu održat će se u velikoj sali Općine Ilijaš, dana 06.12.2013. godine sa početkom u 14,00 sati, a istu će provesti Služba za privredu, finansije i investicije. Nakon provedene javne rasprave primjedbe i prijedlozi će se dostaviti Službi za privredu, finansije i investicije u pisanoj formi ili putem e-maila, najkasnije do 20.12.2013. godine u 12,00 sati.

Pomoćnica načelnika za privredu, finansije i investicije, gospođa Merima Osmanović napomenula je vijećnike da se Nacrt Budžeta općine Ilijaš za 2014. godinu donosi u skladu sa važećim propisima u Federaciji BiH, te ukoliko dođe do korekcija važećih propisa koji tretiraju oblast donošenja budžeta, kao i oblast pripadnosti odnosno raspodjele prihoda doći će do određenih odstupanja koje će se uzeti pri izradi prijedloga Budžeta.

Naime, u parlamentarnoj proceduri je novi „Zakon o budžetima u Federaciji BiH“, koji je usvojen od strane Predstavničkog doma Parlamenta Federacije BiH, a u fazi je potvrđivanje istog od strane Doma naroda Parlamenta Federacije BiH.

Također, u fazi je donošenje Zakona o izmjenama i dopunama Zakona o pripadnosti javnih prihoda u Federaciji BiH, koji je u formi nacrta usvojen na sjednici Predstavničkog doma Parlamenta Federacije BiH dana 24.07.2013. godine, odnosno potvrđen je od strane Doma naroda Parlamenta Federacije BiH na sjednici 26.09.2013. godine, i trenutno je u fazi javna rasprava po istom, koju sprovodi Vlada Federacije. Ponuđenim Nacrtom ovog dokumenta mijenjaju se odredbe člana 24.

pomenutog zakona, odnosno između ostalog mijenjaju se odredbe koje su tretirale pripadnost javnih prihoda za jedinice lokalne samouprave Kantona Sarajevo (općine i grad), tj. uvodi se novi način raspodjele prihoda po osnovu indirektnih poreza za jedinice lokalne samouprave u Kantonu Sarajevo po tzv. „čistom modelu“ (kao i za ostale općine u Federaciji BiH), čime će Općina Ilijaš biti dovedena u poziciju da ostvaruje manje prihoda po osnovu indirektnih poreza za 708.674,00 KM, u odnosu na projicirane prihode po ovom osnovu za 2013. godinu. Općinski načelnik i resorna Služba za privredu, finansije i investicije su pripremili primjedbu na ponuđeni nacrt odnosno prijedlog izmjene „člana 24“ pomenutog zakona, koji će u skladu sa zaključkom usvojenim od strane Doma Naroda uputiti u proceduru ka nadležnom predstavničkom tijelu odnosno Vladi FBiH. Zbog poštivanja procedure prilikom donošenja Budžeta (budžetskog kalendara), kao i poštivanja pozitivnih zakonski propisa koji tretiraju ovu oblast, te svjesnosti značaja donošenja ovog

dokumenta, mišljenja smo da je ovakav prijedlog nacрта dobra polazna osnova za donošenje što kvalitetnijeg i realnijeg budžeta. Smatramo da je ovaj nacrt dobra osnova za utvrđivanje prijedloga budžeta, da će javna rasprava biti konstruktivna i polučiti dosta dobrih prijedloga i da će se u međuvremenu usvojiti Nacrt Budžeta Kantona Sarajevo, kao i donijeti novi Zakon o budžetima u FBiH, te Izmjene i dopune Zakona o pripadnosti javnih prihoda u FBiH, na osnovu koga ćemo utvrditi realan prijedlog našeg budžeta.

Vijećnici su većinom glasova usvojili Nacrt Odluke o izvršavanju Budžeta Općine Ilijaš i ista se stavlja na javnu raspravu.

Ova Odluka predstavlja provedbeni dokumenat Budžeta Općine Ilijaš za 2014. godinu. Mada je ova materija praktično u potpunosti regulisan zakonima, na ovaj način se još preciznije utvrđuju obaveze i odgovornosti Općinskog načelnika i budžetskih korisnika, kao i prava i obaveze Općinskog vijeća u procesu izvršenja Budžeta, a sve u cilju da Budžet općine učinimo još transparentnijim.

Na osnovu odredaba Zakona o građevinskom zemljištu Federacije Bosne i Hercegovine i člana 55. prečišćenog teksta Statuta Općine Ilijaš, Općinsko vijeće Općine Ilijaš donosi jednoglasno Odluku o građevinskom zemljištu kojom se uređuju uslovi i način određivanja gradskog građevinskog zemljišta i ostalog građevinskog zemljišta, sa opisom i grafičkim prikazom granica obuhvata, način dodjele na korištenje građevinskog zemljišta u državnom vlasništvu radi građenja i osnovi i mjerila za određivanje visine naknade za dodjelu zemljišta, uređenje i korištenje građevinskog zemljišta. Gradsko građevinsko zemljište je građevinsko zemljište unutar prostornog obuhvata važećeg Urbanističkog plana Grada Sarajeva za urbano područje Ilijaš kao i vanurbana područja utvrđena u Prostornom planu Kantona Sarajevo za područje Općine Ilijaš. Ostalo građevinsko zemljište je građevinsko zemljište izvan prostornog obuhvata gradskog građevinskog zemljišta na području Općine Ilijaš.

Na osmoj tački dnevnog reda jednoglasno je usvojena Odluka o pristupanju izradi Regulacionog plana "Savića Brdo".

Izrada Plana se radi u svrhu preispitivanja prostornih mogućnosti područja za interpolaciju nove gradnje uvažavajući postojeće stanje i potrebu za kvalitetnijim saobraćajnim rješenjem, preispitivanje dosadašnjih planskih opredjeljenja, opremanje područja društvenom infrastrukturom, te potrebnom mrežom komunalne i energetske infrastrukture. Pristupa se urbanom uređenju područja naselja Savića brdo iz razloga utvrđenih na osnovu analize stanja, realnih potreba lokalne zajednice, izmjenjenih potreba i namjera vlasnika i korisnika zemljišta za novom gradnjom, izmjenjenih vlasničkih odnosa, i ne mogućnosti provođenja Regulacionog plana „Savića brdo“ usvojen prije 28 godina. Cilj izrade Plana je Urbanističkim rješenjem obezbijediti korisnicima prostora bolje uslove za život i bržu realizaciju planskih opredjeljenja, realnu plansku izgradnju, sa krajnjim ciljem zadovoljenja potreba i sigurnosti stanovništva. Okvirna sredstva za pripremu i izradu podloga te izradu Plana u iznosu od 58.000,00 KM obezbjedit će Općina Ilijaš iz Budžeta za 2014. i 2015. godinu, i to: u 2014. godini iznos od 48.000,00 KM, i u 2015. godini 10.000,00 KM. Stvarni troškovi će se utvrditi nakon provođenja tenderskih postupaka i izbora pružaoca usluga.

Vijećnici su većinom glasova usvojili i Odluku o prodaji zemljišta u obuhvatu Industrijske zone "Luke" u Ilijašu. Predmet prodaje je zemljište označeno kao:

- k.č.br. 265/9 po kulturi njiva u površini od 775 m<sup>2</sup> kojoj po novom premjeru odgovara parcela 1508/8 upisana u K.O. Ilijaš Grad
- k.č.br. 265/10 po kulturi njiva u površini od 896 m<sup>2</sup> kojoj po novom premjeru odgovara parcela 1508/9 upisana u K.O. Ilijaš Grad.

Predmetne parcele su po starom premjeru upisane u zk.ul.br. 8381 K.O. SP\_Donja Vogošća.

Prodaja zemljišta vršit će se po početnoj cijeni od 25,00 KM/m<sup>2</sup> zemljišta. Predmetno zemljište se prodaje radi provođenja Regulacionog plana Industrijske zone "Luke" u Ilijašu. Stručne poslove vezane za prodaju predmetnog zemljišta u vlasništvu Općine Ilijaš vršit će Služba za imovinsko pravne poslove, geodetske poslove i katastar Općine Ilijaš.

Vijećnici su potrebnom većinom glasova usvojili i Rješenja iz imovinsko-pravne oblasti, kojim se utvrđuje pravo vlasništva, na koje je dalo pozitivno mišljenje Pravobranilaštvo Kantona Sarajevo. Vijećnicima su predočene Informacija o stanju poljoprivrede na području Općine Ilijaš, te Informacija o bespravnoj izgradnji i sanaciji bespravno izgrađenih objekata, koje su primljene k znanju.

Nakon iscrpljenog Dnevnog reda sjednica je završena u 13:40.